

Jasna Duraković
Zastupnica SBB BIH

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO

n/r JU Kantonalni centar za socijalni rad KS; Ministarstvo za rad i socijalnu politiku, raseljena lica i izbjeglice KS

Sarajevo, 26.03.2019.godina

Prije nekoliko dana obilježen je Međunarodni dan socijalnog rada, na način da se organizirala velika konferencija, gdje se govorilo između ostalog i o unapređenju rada centara za socijalni rad, o obimu dužnosti i obaveza koje centri po zakonu imaju prema socijalno ugroženim kategorijama stanovništva u Kantonu Sarajevo. Govorilo se i o dostignućima, novim metodama rada, boljim rješenjima i adekvatnijim preventivnim mjerama brige i zbrinjavanja onih koji žive na margini ovog društva. U jeku te slave pojavio se članak u dnevnom listu Oslobođenje, koji govori o strašnom nemaru i nebrizi upravo ovih kategorija društva kroz primjer katastrofalno loših uvjeta u kojima žive dvije žene, koje su dale neizmjeran doprinos u obrazovanju naše djece u Sarajevskom Kantonu. Jedna od tih žena je nekadašnja profesorica muzike, dvostruka dobitnica šestoaprilske nagrade za značajna ostvarenja u oblasti pedagoškog rada i odgoja mladih generacija. Danas ta žena koja je slijepa, kao i njena cimerica (nekadašnja pjesnikinja, književnica i novinarka) kao vjerovatno i mnogi drugi ljudi od značaja, koji su dali veliki doprinos ovom društvu, žive na margini siromaštva i preživljavaju isključivo od dobre volje dobrih ljudi, prepušteni na milost i nemilost, potpuno zanemareni od strane nadležnih institucija koje su morale ponuditi svoju pomoć i podršku, a do današnjeg dana to nisu učinile. To je sramota za sve nas, a posebno sramota za ovaj centar i ministarstvo koje se oglušilo na ovakve radnje, te je tek prošle sedmice nakon medijske halabuke smjestilo ove dvije žene u nadležne institucije. I to je tek kratkoročno rješenje koje ne nudi spas od sigurne smrti u potpunom zaboravu i samoći.

Postavljam slijedeća pitanja: 1. Zašto nam uopšte trebaju centri za socijalni rad ako se neće baviti i ovakvim slučajevima i neće svoje kadrove obučavati za rad na terenu kroz obilaskе nezbrinutih, teško oboljelih ili osoba s invaliditetom koje se ne mogu brinuti same o sebi? Gdje je nestala ta socijalna osjetljivost i ljudskost?

2. Kada će ministarstvo obaviti detaljan pregled i kontrolu svih općinskih centara za socijalni rad kako bi se ustanovile potrebe za edukativnom nadogradnjom postojećih kadrova i otvorio prostor za nova radna mjesta jer su nam prijeko potrebni kvalitetni socijalni radnici pošto je to deficitaran kadar već godinama?

3. Pored deficitarnog kadra koji radi u centrima, postoje i mnoge druge manjkavosti u sistemu socijalne zaštite od nedostatka objektivnosti u pojedinim slučajevima do pristrasnosti i neprofesionalnog rada sa strankama koje dolaze u centre da traže pomoć i zaštitu. Kako i kada se to planira riješiti i da li postoji neka strategija rada u narednom periodu koja uređuje ovu oblast, mimo najavljenog projekta izrade socijalnih karti na području KS?

Doc. dr. Jasna Duraković

Zastupnica SBB BiH